



## **QUARTA LINGUA 2014**

### **Quai che dura, bain madira**

Gia dapi blers onns s'engascha la Quarta Lingua (QL) intensivamain per curs da rumantsch per uffants da geniturs rumantschs che vivan a Turitg. Ussa porta sia lavur per l'emprima giada fritg: dapi ils 3 da settember 2014 han lieu mintgamai la mesemna suentermezdi en la chasa da scola Hirschengraben duas lecziuns da rumantsch per duas gruppas da vegliadetgna (scolina ed 1. classa / 2. fin 6. classa). I sa mussa gia suenter in semester: la purschida ha grond success! Il curs ha cumenzà il settember cun 17 uffants. Per l'onn da scola 2015/16 han ulteriuras famiglias annunzià lur interess. L'emprim onn d'instrucziun finanziescha la QL e la Lia Rumantscha (LR). Per segirar la purschida a lunga vista è la QL però avisada sin ulteriurs meds e tschertga partenaris da project e/u fautors interessads.

### **14'000 francs per promover il rumantsch**

Tenor sia incumbensa da promoziun ha la QL sustegnì l'onn da rapport tredesch dumondas cun totalmain 14'000 francs. Ina summa pli gronda ha survegnì quest onn il project da comic digital «Il Crestomat» che sa serva dad elements da la Crestomazia dal 19avel tschientaner e che vul animar ils proxims sis onns a moda regulara da s'occupar cun l'ierta e la cultura rumantscha. En pli ha la QL sustegnì p.ex. in project da cudesch dal Limmat Verlag davart il fotograf dal vitg da Zernez Rudolf Grass (1906 – 1982), la versiun franzosa dal roman «Onna Maria Tumera ni ils antenats», la reediziun dal classicher «Traideschin/Tredeschin» da Gian Bundi en vallader ed en rumantsch grischun, edì da la Chasa Editura Rumantscha (CER), il DC da Corin Curschellas «Triada – dreistimmig» cun Astrid Alexandre ed Ursina Giger u il sisavel champ da vacanzas per uffants e giuvenils rumantschs a Sedrun. A la QL giaschan a cor cunzunt tals projects che tanschan sur ils cunfins da la Rumantschia e ch'èn accessibels er a persunas che na discurren betg rumantsch.

### **Activists linguistics rumantschs**

Ils 17 da december 2014 è mort en la vegliadetgna da 94 onns Vic Hendry, il scriptur tuatschin sesent a Schaffusa. El è stà ditg commember e commember d'onur da la QL ed è s'engaschà per ils interess da l'uniun – dal 1986 fin il 1990 era sco ses president.

A la radunanza generala da la QL che ha gì lieu ils 26 da mars 2014 è stà en il center in um che ha cumbattì cun sias scrittiras per la renaschientscha rumantscha: Peider Linsel (1863 – 1943). Suenter la part statutara ha referì il romanist Rico Valär avant 30 commembers e giasts davart il tema «Ni Tudestgs ni Talians! – Il moviment rumantsch en favur da la patria 1863 – 1938» e davart la significaziun da l'activist linguistic da Sent.

### **Suprastanza**

Co-presidenta	Barbara Strebel, Berna
Co-presidenta	Bettina Berther Desax, Lucerna
Actuar	dr. Linus Bühler, Oberrieden
	Madlaina Peer, Turitg
	Kaspar Silberschmidt, Turitg
	Barbara Kürz, Thalwil
	Nathalie Kiliass, Turitg
	Petra Camathias Ziegler, Turitg